



REGIONE AUTONOMA DELLA SARDEGNA

DELIBERATZIONE N. 12/24 DE SU 26.2.2008

Ogetu: Tzentros contra a sa violèntzia e domos de retzetu pro fèminas vùtimas de violèntzia. Prima atuatzione de sa lege regionale 7 austu 2007, n. 8. Aprovu preliminar.

S'Assessore de s'Igiene e de s'Assistèntzia Sotziale relatat chi cheret printzipiare su protzessu de atuatzione de sa lege regionale 7 austu 2007, n. 8 "Normas pro s'istitutzione de tzentros contra a sa violèntzia e domos de retzetu pro fèminas vùtima de violèntzia" a bisu de sa cale sa Regione depet promòvere e coordinare initziativas pro cuntrastare sa violèntzia de gènere, pro assegurare amparu e agiudu a sas fèminas vùtimas de violèntzias e a sos fìgios issoro.

Sa lege regionale previdit chi sa Regione promovat mescamente duas tipologias de interventu:

--- sos Tzentros contra a sa violèntzia chi acumprint atividades de tutela legale, de acostagiamentu e de consulèntzia psicològica e sotziale, faghent oferta de agiudos pràticos e prontos pro nde leare sas fèminas vùtimas de violèntzia dae situatziones de perìgulu e pro torrare a creare conditziones de bida autònoma e de a sèliu, sestant sèmidas personalizadas de essida dae s'istadu de violèntzia; promovent in prus initziativas de prevenimentu e de sensibilizatzione pro su chi atenet a custu problema;

--- sas Domos de retzetu, istruturas de ospitalidade temporànea chi acasàgiant e amparant fèminas in condizione de disàsiu pro more de violèntzia sessuale o abutinamentos in famiglia, paris cun sos fìgios de edade minore.

Sa lege regionale n.8/2007 previdit, in prus, chi sos entes locales promovant campagnas informativas pretzisas pro su chi atenet a s'atividade e a sos servìtzios ofertos dae su tzentru contra a sa violèntzia e assegurent assistèntzia finantziària adeguada a sas fèminas chi s'agatent in s'apretu de fuire dae sa famiglia e dae sa domo issoro.

S'assessore relatat chi sunt belle aparitzadas sas lìnias de ghia pro s'atuatzione de sa lege regionale n. 8/2007 intro de sas cale sunt individuados sos crìterios e sas prioridades pro sa contzessione de contributos, sos rechisitos istruturales e de su personale de sos Tzentros contra a sa violèntzia e de sas Domos de retzetu, sos protocollos pro s'acasagiamentu.

Unu primu sestu de lìnias de ghia est istadu ogetu de cumparàntzia cun sos rapresentantes de sos sòtzios chi òperant in custu setore de interventu, de sos entes locales e de sos operadores. Sas propostas de integratzione e modifica essidas a campu in sos incontros las sunt oe in die esàminende sos ufitzios chi ant sa cumpetèntzia.

In s'interi de s'aprovu de lìnias de ghia orgànicas, s'Assessore proponet, finas pro assicurare continuidade e funtzionalidade prena de sas istruturas chi esistent, de individuare cun custu provedimentu sos crìterios pro partzire sas resursas a disponimentu pro ocanu, sa partizione de sas resursas intre sas tipologias de servìtzios prevididos e sos crìterios de localizatzione territoriale.

Pro s'atuatzione de sa lege est prevididu unu finantziamentu parìvile a èuros 1.200.000 pro s'annu 2008; èuros 1.800.000 pro s'annu 2009 e èuros 1.800.000 pro s'annu 2010.

S'Assessore proponet, pro s'annu 2008, de destinare a su finantziamentu de sas Domos de Retzetu pùblicas èuros 950.000, e pro su finantziamentu de Tzentros contra a sa violèntzia pùblicos èuros 250.000.

S'art. 3 de sa LR 8/2007 apostìvigat chi podent èssere istituidas Domos de Retzetu in comunas chi tèngiant una populatzione non minore de 30.000 abitanti.

Postu in contu chi, in Sardigna, sas comunas cun populatzione prus manna de 30.000 abitanti sunt 8, isparginadas in 6 provìntzias, s'Assessore proponet chi sas resursas chi pertocant s'annu 2008 siant reservadas a su finantziamentu, a primu bessu, de sas istruturas pùblicas chi òperant giai (Tàtari e Nùgoro) e, a pustis, a sas istruturas chi ant a èssere realizadas in su cursu de s'annu.

Pro s'annu 2008, sas Domos de Retzetu chi giai òperant ant a pòdere duncas contare subra unu finantziamentu calculadu pro totu s'annu, de dimensiones prus mannas de veras chi non cussas a regime, cando sos istantziamentos ant a èssere partzidos subra unu nùmeru prus mannu de istruturas. Sas Domos chi òperant oe in die ant a dèpere garantire s'acasagiamentu finas a sas fèminas residentes in sos territòrios chi no ant istruturas e ant a dèpere programmare pro su tempus benidore formas adeguadas de cofinantziamentu in càrrigu de sos Entes Locales interessados.

Sas Comunas chi ant giai ativadu una Domo de Retzetu est pretzisu chi presentent, intro de 30 dies dae s'aprovu definitivu de custu provedimentu, una relata subra s'atividade acumprida in sos ùrtimos duos annos, unu programma pro s'annu in cursu e sa documentatzione chi pertocat a su possessu de sos rechisitos prevididos dae sa LR 8/2007 (o unu programma de adeguamentu de custos matessi).

Pro sas istruturas chi depent galu abèrrere, pro s'annu 2008 at a èssere assicuradu unu finantziamentu chi pertocat a su periodu de funtzionamentu efetivu de sa Domo. Sas Comunas interessadas sunt obligadas a presentare, intro de sessanta dies dae s'aprovu definitivu de sas lìnias de ghia, unu progetu organizzativu e funtzionale de s'istrutura subra sa base de sos inditos, de sas modalidades, de sos istandard istruturales e de personale càbidos in sas lìnias de ghia matessi.

Pro su primu annu de atuatzione de sa lege regionale mentovada, s'Assessore proponet de partzire sas summas istantziadas pro s'annu corrente pro sas Domos de Retzetu pùblicas (gestidas a manera direta dae sas Comunas o in affidamentu esternu a sugetos de sos cales a s'articulu 2, comma 2, LR 8/2007) parivile a èuros 950.000, cun sas modalidades chi sighint:

___ èuros 500.000 pro sas Domos de Retzetu chi òperant giai, de partzire subra sa base de sa populatzione femminile de referèntzia, posta in contu s'atividade acumprida in sos ùrtimos duos annos, de su programma de atividade pro su 2008, fata chi siat sa verifica de sos rechisitos de sos cales a sa LR 8/2007 (o a su programma de adeguamentu a sos matessi rechisitos) e de sas conditziones de sas cales a custa deliberatzione;

--- èuros 450.000 pro sas Domos de Retzetu pùblicas de istituzione noa, de partzire subra sa base de sa populatzione femminile de referèntzia, de su periodu efetivu de atividade pro s'annu 2008 e de sa calidade de su progetu presentadu, fata chi siat sa verifica de sos rechisitos de sos cales a sa LR 8/2007 e de sas conditziones de sas cales a custa deliberatzione.

Pro cantu atenet a sos Tzentros contra a sa violèntzia, in cunforma a sos disponimentos de s'art.3 de sa lege mentovada, est programmada s'istitutzione de oto tzentros, unu pro cada provìntzia. Pro ocannu, ant a pòdere atzèdere a su finantziamentu, a manera prioritària, sas Comunas assotziadas intre issas pro cuntestu Plus de su cale a s'art. 15 de sa LR 23/2005. Sas modalidades de presentatzione de sos progetos pro su finantziamentu de Tzentros contra a sa violèntzia, e de sos rechisitos istruturales, de su personale e organizzativos, sunt finas issos apostivigados dae sas lìnias de ghia.

Pro su primu annu de atuatzione de sa lege regionale 8/2007, s'Assessore proponet de partzire sas summas istantziadas pro ocannu, pariviles a 250.000 èuros, intre sos Tzentros Contra a sa Violèntzia (gestidos a manera direta dae sas Comunas o

in affidamentu esternu a sos sugetos de sos cales a s'articulu 2, comma 2, LR 8/2007) subra sa base de sos crìterios chi sighint:

- popolazione femminile de riferimentu.
- valorizzazione de sas esperièntzias e de sas cumpetèntzias espressadas a manera locale dae entes, sòtzios de voluntariadu e organizatziones non lucrative de utilidade sotziale de sas cales a su comma 2 de s'articulu 2 de sa LR 8/2007,
- calidade de su progetu presentadu.

Sas Domos de Retzetu e sos Tzentros contra a sa violèntzia chi òperant giai, finas dae sa fase attuale de aplicatzione de sa lege, ant a dèpere pònnere mente a sos inditos chi sighint:

- sos servìtzios de sos Tzentros Antiviolenzia e de sas Domos de Retzetu sunt a indonu, finas pro sos tzitadinos non residentes in sa Comuna in ue b'(?)est s'istruutura e pro sas fèminas chi non tenent sa tzitadinàntzia italiana;
- in s'acumprimentu de sos interventos ant a dèpere èssere valorizadas sas pràticas de retzetu autònomas e gestidas da sas fèminas dae perissas;
- sos Tzentros contra a sa Violèntzia depent fàghere atividades informative adeguaadas e periòdicas pro su chi atenet a sas atividades e a sos servìtzios ofertos;
- sos Tzentros contra a sa Violèntzia ant a dèpere, a tempus, aderire a su servìtziu natzionale telefònicu unificadu 1522; in s'interi, ant a pòdere impreare nùmeros telefònicos cun caràtere de utilidade pùblica, publitzizados a manera adeguada, chi siant in funtzione nessi 12 oras pro die;
- sas Domos de Retzetu e sos Tzentros Contra a sa Violèntzia depent operare in retze, finas subra sa base de inditos e interventos de coordinamentu de sa Regione, a fines de garantire uniformidade in s'acasagiamentu e respostas diversas pro sas esigèntzias diferentes.

Sa Giunta regionale, pustis de àere intesu sa proposta de s'Assessore a sa Sanidade, bidu su parre de legitimidade de su Direttore Generale de sas Politicas Sotziales

DELÌBERAT

- de destinare a su finantziamentu de sa gestione de sas Domos de Retzetu pùblicas (gestidas a manera direta dae sas Comunas o in affidamentu esternu a sugetos de sos cales a s'articulu 2, comma 2, L.R. 8/2007) èuros 950.000, de partzire

pro èuros 500.000 in favore de sas duas Domos de Retzetu chi òperant giai in Tàtari e Nùgoro, e pro èuros 450.000 in favore de sas Domos de Retzetu chi si depent galu istituire;

- de programmare s'istitutzione de oto tzentos territòriales contra a sa violèntzia pùblicos (gestidos a manera direta dae sas Comunas o in affidamentu esternu a sos sugetos de sos cales a sos articulos 2, comma 2, L..R. n. 8/2007), uno pro cada provintzia. Pro ocannu, ant a pòdere atzèdere a su finantziamentu pro sa gestione, a manera prioritària. Sas Comunas assotziadas pro cuntestu Plus de su cale a s'art. 15 de sa L.R. n° 23/2005;
- de destinare a su finantziamentu de sa gestione de sos Tzentros contra a sa violèntzia programados sa summa de èuros 250.000.

Su gastu intreu prevididu pro s'istitutzione de sas Domos de Retzetu e de sos Tzentros contra a sa violèntzia, parìvile a èuros 1.200.000, at a fàghere càrrigu subra s'UPB S 05.03.009 de su Bilàntziu regionale 2008 chi s'est aprovende in custas dies.

Custa deliberatzione at a èssere imbiada a su Consighiu regionale pro s'achirimentu de su parre de sa Commissione consiliare cumpetente, gasi comente prevididu da s'art. 9 de sa lege regionale 7 austu 2007, n. 8.

Su Direttore Generale
Fulvio Dettori

Su Presidente
Renato Soru